

# Program pemukiman perkukuh kesepaduan Jemaah Menteri

BH - 16/11/2022 m/s: 2

Inisiatif dilaksana  
pertingkat  
pelbagai aspek  
penyampaian  
khidmat kerajaan

Oleh Irwan Shafrizan Ismail  
bhnews@bh.com.my

**Putrajaya:** Program pemukiman anggota Jemaah Menteri Kerajaan Perpaduan semalam, antara lain bagi memperkukuh dan memantapkan kesepakatan serta kesepaduan kalangan anggota Kabinet.

Jabatan Perdana Menteri (JPM) dalam kenyataan, berkata program itu dihadiri Perdana Menteri, Datuk Seri Anwar Ibrahim bersama 27 anggota Jemaah Menteri dan 10 pegawai kanan kerajaan diadakan di Kompleks Seri Perdana di sini.

“Program dilaksanakan bagi memperkukuh dan memantapkan kesepakatan dan kesepaduan dalam kalangan anggota Je-



Anwar bersama Mohd Zuki (tiga dari kiri) tiba di Kompleks Seri Perdana, Putrajaya bagi menghadiri sesi pemukiman bersama Jemaah Menteri, semalam.

(Foto BERNAMA)

maah Menteri Kerajaan Perpaduan.

“Selaras dengan hasrat Perdana Menteri dalam menterjemahkan agenda islah dan reformasi

dalam pentadbiran Kerajaan Perpaduan, program pemukiman ini diisi dengan sesi taklimat khas mencakupi aspek penting ke arah pemantapan penyampaian

perkhidmatan serta pengukuhan tatakelola atau tadbir urus jentera kerajaan.

“Aspek ini merangkumi struktur kerajaan dan hal ehwal pen-

tadbiran awam, pengurusan kewangan dan perolehan kerajaan.

“Persidangan antarabangsa dan kepentingan negara, protokol kerajaan dan profesionalisme, pembangunan lestari, senario ekonomi dan cabaran serta taklimat berkaitan komunikasi media,” katanya di sini semalam.

Katanya, Ketua Setiausaha Negara, Tan Sri Mohd Zuki Ali, turut menyampaikan taklimat pelaksanaan petunjuk prestasi utama (KPI) anggota Jemaah Menteri ketika sesi pemukiman itu.

Difahamkan, sesi pemukiman terbabit bermula jam 8.30 pagi semalam dan berakhir jam 4.30 petang.

## Hala tuju Kerajaan Perpaduan

Sementara itu, Timbalan Perdana Menteri, Datuk Seri Dr Ahmad Zahid Hamid, menerusi hantaran di Facebooknya memaklumkan pemukiman terbabit bagi membincangkan hala tuju Kerajaan Perpaduan.

“Selain berbincang mengenai hala tuju, keberadaan kami juga berkait rapat dengan penetapan KPI untuk setiap kementerian,” katanya.